



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

11. Kalenderwoche – ab 14. März 2010

Nisch mähr zu reddn!

Ährlisch, isch hab vorsche Woche dähn Fraundaach gladd vorgessn. Un was das Schärfsde is - meine Gudste ooch! Wo die doch immor so bißl fiehr de Fraunreschde gewähsn is... un fiehr de Emannzibadsjohn un so! Nee, wie isch das bewärdn soll, weeiß isch noch nisch genau. Wo isch meine Gudste befrachd hab, wieso se nisch dran gedachd hadde an dähn Fraundaach, da hadse bloß e bißl geseufzd un had gesachd, se hädde schon dran gedachd, abor ehm bloß so als Erinnerung. Dähr Daach däde nisch mähr rischdisch agduell sein. Mor kennde dähn Daach, dähn isch eschd vorgessn hadde, werglisch gladd vorgessn! Se hädde dähn Daach mid Absischd vorgessn!

Dähr däde nischd mähr bring! Dähr däde keen Sinn mähr machn! Dähr däde sisch nisch mähr reschnen!

Ja, laudor solsche schlaun Wessischbrische hadse gesachd. Meine Gudste! Nee, da musses werglisch beese aussähn in dähr ihror Seele. Un wo isch dann sozusachn im Nachgang e Fläschl Wein offgemachd hab, zur Feior des vorgessnen Daaches, da hadse zwar ooch zwee Gläsl gedrunkn, abor rischdisch in Schdimmung isse nisch gekomm. Wo isch dann ma so e Liedschn angeschdimmd hab... "wenn Muddi frieh zur Arbeid gehd..." - naja, isch wollde se bißl offheidorn! - da hadse bloß miede geläschld. Nee, da is nischd mähr zu reddn gewähsn. Dähr Daach war bfudsch!

Un daderbei is dähr Daach friehor werglisch sähr scheen gewähsn. Wenn isch da an unsorn VEB denkn du, da ham de wergdädischn Fraun am achdn März immor gleisch frieh een Schdrauß Blum gegrischd... vom Scheff bersehnlich. Un dor Bardeifridze war ooch dabei. Mir alle annorn ham

Schbalier geschdandn un ham graduliert. Dann ham mir de Fraun in de Bedribskandiehne vorabschieded un ham uns unsorn Morschngaffee alleene gekochd.

In dor Bedribsgandiehne war dann eene scheene Feior. De Fraun ham dord ooch algoholische Gedränke, Auszeischnungen und eene Fesdrede vom Bedribsdiregdor embfang. Auserwählde männliche Golleeschn mussdn sich anbudzn - mid Schirze odor Dederon-Kiddl - ham de weiblischn Golleeschinnen bediend un ham sich geeschn Ende dor Feiorlischkeidn von de zunähmend endhemmdn Damen ooch ma begrabschn lassn. Da durfdesde als Mann nisch zimborlisch sein. Es war ja Fraundaach!

Ja, dor wähsendlich Deel vom Fraundaach had in de volkseischen Bedriebe schdaddgefundn. Daheeme war dann noch, dass isch dähn Offwasch iebornomm hab un eene Schachdl Weinbrandbohn ohne Grusde. Blum gabs ja, wie gesachd, schon im Bedrieb.

Ob isch womeeschlich mid Weihnbrandbohn was hädde machn kenn? Villeischd näschesdes Jahr? Abor ohne Grusde is ja heidzudaache ooch nischd Besondorsch mähr! Nee, isch gloobe fasd, dähr Daach is werglisch nisch mähr zu reddn. Mid odor ohne Grusde!

Eduard Sachsenmeyer